

『續日本紀』27 天平神護二年十月癸卯条

癸卯。勅。去六月爲有所思。發菩提心。歸无上道。因有靈示。緘器虔候。遂則舍利三粒見於緘器。數月感歎莫識所爲。朕聞。麟鳳五靈。王者嘉瑞。至德之世。史不絕書。未見全身舍利如是顯形。有感必通。良有以也。朕以虛薄。兢懼歷年。撫育乖方。氷谷在惕。豈念。至道凝寂。應微情而示眞。圓性湛然。結靈光而表質。孤園絕跡。久矣驚心。雙林挽客。爛然滿目。玄珪綠字。何以同年。西法東流。知在茲日。猥荷希世之靈寶。盍同衆庶之歡心。宜可文武百官六位已下及内外有位加階一級。但正六位上者。廻授一子。其五位已上子孫年廿已上者。亦叙當蔭之階。普告遐迩知朕意焉。授從五位下李忌寸元環從五位上。正六位上袁晋卿從六位上。皇甫東朝。皇甫昇女並從五位下。以舍利之曾奏唐樂也。